

THESES INAUGVRALES MEDICAE  
DE

# VOMITV CRVENTO,

QV AS

*DIVINIS AVSPICIIS*

PRAESIDIO

PRO-RECTORIS MAGNIFICI

DN. FRIDERICI HOFFMANNI,

ORDINIS MEDICI SENIORIS

ET H. T. DECANI

*PRAECEPTORIS AC PROMOTORIS SVI  
AETATEM VENERANDI*

PRO DOCTORIS GRADV

A. D. MARTII MDCCXXIX.

H. L. Q. C.

PLACIDO COMMILITONVM EXAMINI SVBMITTIT

AVCTOR

ERNESTVS EMMANVEL GVTTORFF

WOLMIRSTADIO-MAGDEBVRGICVS.

---

HALAE MAGDEBVRGICAE,

LITTERIS JOHANNIS CHRISTIANI HENDELI, ACAD. TYPOGR.

THESE INVENTORIES MEDICAL

# VOLUME CRV

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL

THESE INVENTORIES MEDICAL



# PROOEMIUM.

**R**etissime olim de officio ventriculi publico cecinit *Q. Serenus Sammonicus*:

*Qui stomachum regem totius corporis esse*

*Contendunt, niti vera ratione videntur:*

*Huius enim validus firmat tenor omnia membra,*

*Et contra eiusdem firmantur cuncta vigore.*

Cardo enim sanitatis in eo potissimum versatur ut ventriculus, ceu universalis corporis nostri coquus, exacte suo fungatur munere: nam quamdiu ille robore ac vigore pollet, debita quoque procedit assumptorum digestio, bonus confit chylus, & ex hoc laudabilis generatur sanguis, vitæ & virium thesaurus. Prudenter itaque illi medicorum agunt, qui in morbis tollendis ante omnia huius visceris habent rationem, quippe illo integro, salubre & corpus est; sin male affectus, maximis valetudinibus præbet initia. Vix vero ulla in humana machina existit pars, quæ facilius promtiusque offendi ac destrui queat, quam hocce ciborum receptaculum, ob copiam & ingentem varietatem ingestorum, succorumque eo confluentium, aliasque ob causas; hinc haut numerandæ morbosæ in illud cadunt affectiones: quas inter merito recensendus est **VOMITVS CRVENTVS**, quem pro specimine inaugurali ad examen revocare constitui. Sed quum dicendorum uberrima sit copia, & magni iam medici passim in hoc argumento desudaverint, non omnia eius capita ad unguem pervolvam, verum theses tantum quasdam pro viribus ingenii mei pertractandas elegi. Adspiret conatibus meis, Summum, cuius auxilium devotissimis precibus imploro, Numen.



Thesis I.

Sanguinis vomitione ex ventriculo reiectio, vomitus cruentus dicta, differt ab aliis hæmorrhagiis, ratione partis affectæ, & modi excernendi.

**A**ctum agerem, si in recensendis differentiis quarumlibet sanguinis excretionum, corpus humanum affligentium, multa verba facerem, quoniam permulti practico-  
rum in scriptis suis easdem, acri iudicio investigatas, oculis lectorum exposuerunt: paucis tamen earum mentionem iniicere necessum duco, quæ cum vomitu sanguinis id commune habent, ut per os soleant extundi. Inter has primo sese offert hæmoptysis, quæ in eo a nostro affectu discrepat, quod ex ipsa pulmonum compage asperaque arteria, sanguis sincerus floridus rutilans & maiori ex parte spumofus, mediante tussi, feratur. Haut vero iuste, secundum nonnullorum doctrinam, hæmoptyseos a sanguinis vomitu differentia in eo collocatur, ac si per illam sanguis arteriosus, per hunc vero venosus reiceretur: cuius asserti veritatem inferius aptior examinandi erit locus. Huic sinceri sanguinis ex thorace excretioni mox subiungimus sputum cruentum, cuius locum affectum fauces partesque summi oris constituunt, quique per scretum absolvitur, ut ut interdum quoque, quando scilicet ex vasculis sanguinem vehementibus, & circa epiglottida asperæque arteriæ principium reptantibus, ad apertis emanat, aut ex superioribus faucium nariumque angustis, ad hæc loca destillando delabitur, cum tussi ferina catarrhali stipatum excernatur. Nec minus sanguinis sputum exigua sua quantitate sese prodit, quoniam in striis tantum, laticem salivalem rubro colore tingentibus, eliminatur; qualis etiam solet esse, quæ ex gingivis, dentiumque cavis suctione prolecta, profluit, & simplici saltem sputatione exscreatur. Longe aliter vero in vomitu cruento res est expedita, siquidem sine tussi scretuque, ut plurimum



mum crassus, immoratione concretus, nigrescens, glomera-  
 tus copiosusque sanguinis cruor, cum molesto ac anxio ad  
 vomendum conatu, reliquisque vomitionum symptomati-  
 bus, ex ventriculi cavitate, in quam prius divertit, impetuo-  
 se & confertim pellitur atque reiicitur. Nitide hanc diffe-  
 rentiam *Henricus ab Heer* in *Observat. medic. XX.* exponit,  
 aliud esse, inquit, spuendo cum tussi sanguinem screare flo-  
 ridum, flavum, spumantem, vel spumam verius, aliud cras-  
 sum cruorem vomitu deplere. Nec silentio hic prætere-  
 undum est, *Dominicum Panarolum* affectum nostrum Chole-  
 ram appellare sanguineam, eo quod pars cruoris simul per  
 alvum descendat: sed discernere hos morbos convenit, il-  
 lamque ad hæmorrhagiarum classem potius referimus, mor-  
 bumque nigrum Hippocratis cum aliis nuncupamus.

### Thesis II.

Causæ vomitus cruenti sunt innumeræ.

**Q**uemadmodum omnium morborum agmina non ex  
 una, sed pluribus simul concurrentibus causis produ-  
 cuntur, quarum aliæ in scholis vocantur propinquæ, aliæ,  
 his subservientes quam plurimæ, remotæ: ita vomitus cru-  
 entus similibus infinitisque generatur ex causis. Si proxi-  
 mam & continentem tam gravis morbi quærimus ætiolo-  
 giam, in solidis eam reperimus partibus; in vehementia  
 scilicet spasmodum, quibus vomitus, seu retrogradi mo-  
 tus peristaltici fibrarum muscularium ventriculi & non-  
 numquam ipsorum intestinorum inducuntur, unde con-  
 tentia illorum, sanguis nempe cum aliis in eorum tractu  
 collectis expelluntur. Causam proximam materiale seu  
 efficientem accusamus sanguinem extravasatum inque ven-  
 triculi cavo hærentem: apertionem vero vasorum causam  
 antecedentem proximam statuimus. Reddunt deinde  
 nunc propius nunc remotius hominem ad hunc affectum  
 idoneum omnia, quæ partim solidorum tonum immutant,



partim sanguinis massam in mixtione sua & motu turbant. Primarium autem inter has causas procatacticas locum obtinet abundantia sanguinis, quæ extensiones vasorum, spasmos, lacerationes canalium, compressiones in minimis vasculis, indeque stases, obstructions milleque cruciatu alios inducendo, multarum affectionum, in primis hæmorrhagiarum vomitusque cruenti fœcunda est mater. Et hæc sanguinis nimia copia, præcipue ab excretionibus ejus sive naturalibus sive artificialibus consuetis, cohibitis, vel omissis, inducitur atque fovetur; unde plerumque feminarum necessariæ vacuationis vitiosam emanationem vel suppressionem, vomitus cruenti auctorem esse, multi, ut *Amat. Lusitanus Cent. VII. curat. 17. Rulandus curat. empir. C. III. cur. 4. Schenckius*, aliique viri annotarunt; & *Salminus Cent. II. hist. 24.* a mensibus in gravidis retentis eundem prognatum observavit. Eadem quoque ratione in viris hæmorrhoides suppressæ procedunt, hancque sanguinis excretionem excludunt, uti *Eph. N. C. D. II. A. 4. obs. 91. & Dec. III. An. 4. obs. 102.* aliique practici satis comprobant. Neque minus ab evacuationibus artificialibus neglectis, præsertim in iis, quibus menstrua vel hæmorrhoidalis sanguis haut rite amplius profluunt, præter alios *Magnif. D. D. Præses* aliquoties annotavit. Alias jam causas abundantiam sanguinis ingenerantes, ob brevitatis studium lubens prætereo: illud tamen adhuc ratione sanguinis interferere convenit, quod etiam qualitate sua & motu perverso locum inter hæc causarum genera mereatur. Si enim vel nimis firma particularum cohæsiōne spissitudinem adipiscatur, productio ejus aciter impeditur, difficilis languidusque motus, obstructions in capillaribus canalibus, stagnationes & pathemata spasmodica oriuntur, vel si admodum fluxilis existat, ad graves congestiones, orgasmum apertionemque vasorum fundamenta præbet. Descendo nunc examinatis a fluidorum vitio desum-

tis



tis principalioribus ætiologiis ad motus inordinatos solidorum, qui fertiles æque hæmorrhagiarum proindeque vomitus cruenti sunt productrices. Hi vero motus solidis inhærentes, quando vel nimium intenduntur, producunt effrænatos nervosarum partium distensiones, quæ humorum circulum inæqualem reddendo, hunc morbum apte excludere valent; vel si nimium ex prægressa spasmodum atrocitas debilitentur, atoniam & imbecillitatem partibus hisce inducunt, unde stagnationes affluentium humorum materiaque novorum spasmodum ingeneratur, ut sic per circulum una afflictio alteri manum porrigat. Innumeris autem modis solidorum intensior motus fieri potest, inter quos, superius adducta sanguinis copia, & quæ fibrarum robur afficere ulla ratione queunt, referri merentur. Possem itaque multas & longe plures alias cumulare vomitus cruenti causas remotas, quales sunt externæ, ut ictus contusiones, vulnerationes, vel ab extra corpori illata, venena, vomitoria, purgantia, acria remedia, animalcula, quale exemplum *Riverius Cent. IV. obs. 26.* de deglutita hiru- dine refert, possem, inquam, cumulare innumeras causas, ratione errorum in rebus sic dictis non naturalibus commissorum, inprimis animi pathematum, ut *Henr. ab Heer. l. c.* ab iracundia memorat, item ratione temperamentorum, ætatum, vitæ generis, prægressorum morborum, ut ex quartana, ex ulcere consolidato tibiæ observante *Rhodio Cent. II. obs. 65.* aliarumque morbificarum causarum; sed quoniam longum nimis ac operosum foret, omnesque hæc causæ novum & incongruum in fluidis & solidis corporis nostri partibus statum excitando, illasque ad vomitionem cruentam præparando, ludunt, hæc qualiacunque quoad ætiologias huius affectus, thesesque veritatis confirmationem sufficiant.

### Thesis III.

Accurata collectio signorum nobis in cognoscendo  
huius morbi genio multum lucis fœneratur.

Mani-



**M**anifestis quidem sese signis profert hæc sanguinis ex ventriculi cavo profusio, ordinaria tamen, quæ son- ticum hoc malum præcedunt ipsique inhærescunt, sequen- tia enumerantur signa. Præcursores, qui illud imminere annuncient, ut plurimum habet crebras sputationes, mi- ras anxietates in regione præcordiorum, tensivos & grava- tivos dolores spasmosque per intervalla repetentes hypo- chondrii, præsertim sinistri, constrictiones cardialgicas ventriculi, cum fuis sudoribus frigidis, in primis extremo- rum, calore & frigore alternante: sentitur pondus & com- pressio in hac stomachi regione, cui se jungunt variatio in pulsu, interdum vertiginosa capitis turbulentia, imo ani- mus subinde deficit; quæ ultima maxime eo morbi statu adfociantur, quando in larga quantitate ubertim, vel rei- teratis mox vicibus fluidum hoc vitale foras propellitur. Inter hæc nausea urget, & molestus anxius & irritus vo- mendi conatus, donec tandem vomitus in actum erumpit, sanguisque cum contentis in ventriculi antro permixtus eliminatur: sique non protinus corpus a materia, unde gravatur, vomitione depleatur, sanguis prodit concretus glomeratus & niger. Ventriculo postea a sarcina liberato, levatus quodammodo æger videtur, pressio spasticaque con- strictio vel plenarie cessant, & sic unica vomitio sufficit, vel paululum saltem remittunt, & nunc longiori nunc bre- viori temporis intervallo, imo statis nonnumquam horis hæc cruoris revertitur eiectio, & tunc non solum gravi- animi occupantur defectione, pulsus redditur debilis & frequens, cibi desiderium subsidet, sed vigor quoque viri- um diminuitur, nitor oris perit, vividique coloris flos ex- pallefcit. Nec hæc omnia omnibus, sed alia aliis accidunt, pro diverso causæ, hanc excretionem producentis, et cir- cumstantiarum habitu. Sic alii cruorem foetidi odoris nigricantem vomitione extundunt: quibusdam pulsus ma- gnus & vehemens, imo febris iungitur: nonnulli ægerri-  
me



me ferunt hanc reiectionem, viribus inde valde depauperatis: alii contraria experiuntur, præsertim quibus solitæ sanguinis excretiones plus iusto retinentur. Notante *Et-müllero Oper. præct. comp. Lib. I. Sect. VI. c. 3.* dolor magis ad dextrum hypochondrium excurrit, superioremque etiam lumborum partem infestat dolor gravativus, si pancreatis vitio vomitus sanguinis oriatur: rursusque alia alii patiuntur. Universam vero horum symptomatum syndromen, qua hic vomitus stipatur, eiusque genium consideraturus, illum inter affectus spasmodicos, in solidis partibus fundatos, refero, cominorque signorum rationes exinde peti posse sentio; quippe in spastica nerveorum ventriculi laterum stricture omnis vomitus essentia consistit, licet ob prægressum sanguinis exitum classi hæmorrhagiarum totus morbus accenseri mereatur. Deinde quoque fluida nostræ machinæ sequuntur motum solidorum, & vice versa, fereque nulla sanguinis ab interna causa proficiscens effusio sine spasmis, vel eos subsequente atonia, prægressis, evenit. Aucto enim per supra adductas aliasque innumeras causas solidorum tono, humorum inæqualis fit circulus, ab ambitu extremisque partibus corporis ad interiora sanguis urgetur, organa & vasa excretoria constringuntur, eliminanda retinentur, unde copia impuritasque eius magna sumit incrementa, congestiones, translationes ad alia loca, imo effusiones ipsius, ut in hoc affectu in ventriculi cavum, vomitus, aliaque gravia mala emergunt: spasmus deinde, qui sanguinem cum impetu ad alias partes congerebat, evanescente, remanet in illis debilitas, & ex hac stagnationes humorum, pabulumque novorum insultuum subministratur, qui levi accedente causa, denuo tragœdiam suam agunt, hæcque symptomata progignunt; quæ omnia pro more suo solidissime deduxit *Illustris D. Præses in Tom. II. Medic. Systemat. ration.*



Thesis IV.

Uti rectius hæmorrhagiarum ætiologiæ ab arteriis  
quam venis repetuntur : ita quoque vomitus  
cruentirationem exinde petimus.

**P**Lerumque in ætiologia excretionum sanguinis, arteriis neglectis, venæ nominantur, ac si illis solis id negotii competeret. Urgetur ante omnia experientiam docuisse, sanguinem ex venis sponte apertis profundi, quod tamen non sine plane contraria legibus naturæ ratione evenire posse arbitror: minime autem inde conclusio deducenda est, semper ex venoso systemate hisce in fluxionibus mitti sanguinem. Longe enim firmioribus ac validioribus argumentis ea stabiliri potest sententia, quæ arteriis illud munus tribuit, eaque partim ex ipso sanguinis motu circulari, partim ex ipsa fabrica & structura vasorum aliisque phænomenis desumemus. Per arterias itaque impulsu cordis valido omne sanguinis flumen ad minima etiam corporis puncta deferitur; per venas vero ad idem principium, unde venerat, cor nempe refluit; venæ proinde quod vehunt liquidum ex arteriis hauriunt, arteriosusque perpetuo a tergo appulsus sanguis, illius, qui in venis est, regressum prohibet; unde magnum sane esset postulatum, sanguinem periodum penitus adversam ac retrogradam capeßere, si ex venis foras emanaret. Pollent quidem spasmi, hæmorrhagiarum fabri, ea potentia, sanguinem iam mole turgescenciaque peccantem, vel in alio loco obstaculum invenientem, ad partem quamdam pellendi, ast non solæ venæ ab iis afficiuntur, quia, ut verbis acutissimi *Bærhavii Instit. Medic. §. 214.* utar, nulla in universo corpore particula sensibilis sit, quin habeat arteriosam, ut docent vulnuscule, microscopia, iniectiones: quare & arteriæ eidem succumbunt cladi, licet minori gradu ob renitentiam maiorem pulsusque a tergo continuo urgen-

gen.



gentem illis proprium. Reperiuntur utique venæ in maioribus suis divaricationibus respectu arteriarum longe tenuiores, hincque dilatationi spasmoque magis expositæ; arteriarum autem minimarum crassities cum tunicarum in venarum radicibus tenuitate fere convenit, suntque arteriolarum ultima tam angusta, ut ubi in venas abeunt, omnes arteriarum proprietates exsuant, nec exacte venæ ab iis discerni queant. Quis igitur dubitabit, tam subtiles arteriarum canales non pariter extendi ampliari & urgeri posse, ut latera eorum ab invicem dehiscant? imprimis cum in illo loco maxima fiat distensio a fluidorum impetu, ubi tunicæ sunt molliores ac subtiliores: hic autem ille locus est, ubi arteriæ cum venis cohærent, & canales illarum conici cylindraceam quasi acquirunt figuram, inque initia venularum terminantur. Quando igitur ob spasmus sanguis venosus ultra ferri nescius, pondere suo inferiorem ascendentem premit, arteriæ vero pulsum suum continuando semper novam liquidi copiam cum impetu suggerunt, regressumque venosi impediunt, aliter fieri nequit, quam ut ultima arteriolarum, utpote tenerrima tunica instructa, dilatentur, aperiantur, sanguinemque eructant, vel lateralia vasa ultra modum dilatata, sanguinem loco subtilioris liquidi, quod antea vehebant, transmittant. Ex eodem fundamento obviam ire licet illorum objectioni, qui sanguinem arteriosum cum impetu saltuque proflire existimant. Novisse enim convenit, maximum intercedere discrimen inter arteriarum maiores ramos, & inter extremitates illarum capillares, quæ tunica sua crassiore amissa, pulsationem saltumque eludunt: id quod etiam scarificatio docet, in qua venulæ æque ac arteriolæ simul aperiantur, sanguine tamen non cum saltu eructante. Testatur tamen ipsa etiam autopsia cum saltu quoque sanguinem sub hæmorrhagiis interdum protrudi, & præter alios *Wedelius in Eph. Germ. D. L. A. 3. obs. 22.* com-



memorat exemplum feminæ senilis, in qua tamquam e si-  
phunculo sanguis pervasa in anum explicita cum saltu  
profluxit. Quod si porro quantitatem istam liquidi vita-  
lis, quæ in hæmorrhagiis fundi solet, ponderemus, facile  
colligere licebit, venosum minime sufficere; protinus e-  
nim illud, quod in venula aperta usque ad radices suas  
fuit contentum, effluet, nisi ex corde per arterias novus  
affluxus subministraretur. Obloquitur deinceps ipsa va-  
forum structura; venæ enim ex radicibus exiguis in am-  
pliores ramos excurrunt; arteriæ contra ex spacio ampli-  
ori in angustissimum properant: hinc si sanguis venosus  
funderetur, ex patenti alveo colligi, & contra suum pro-  
gressivum motum in angustiores ductus & per aperturam  
remeare deberet, quæ sane postulata omnibus microco-  
smi motuum legibus aperte repugnant. Non minus quo-  
que hisce respondetur illi dubio, quo ob difficilem san-  
guinis ad fontem suum regressum, ipsius promptam stagna-  
tionem, reditum & effluxum urgent: structuræ enim ve-  
narum iam propositæ, & appulsui continuo arteriosi san-  
guinis, si addas valvularum in venis apparatus, vena-  
rum numerum longe maiorem, aliaque, quibus venosi  
fluidi progressus ad cordis ventriculos adiuvatur, ad-  
minicula, facile & hoc removeri posse dubium existi-  
mo. Neque arteriarum post mortem sanguine deple-  
tarum conspectus aliquid contrarii involvit, idque con-  
tractioni arteriis propriæ in acceptis ferendum est, qua  
liquidum contentum in venarum propellunt radículas  
in quibus, maiori spacio nunc accepto ulterius ad ra-  
mificationes illarum derivatur, ita quidem, ut supera-  
to earundem renisu omnes cruore infarctæ compare-  
ant. Magnam denique lucem nostræ sententiæ fœne-  
ratur illud phænomenon, quo effusiones sanguinis or-  
dinario in iis locis contingere observamus, ad quæ di-  
ves



ves huius liquidi copia, multæque arteriæ dimittuntur ad secretionem destinatæ, uti in naribus renibus ventriculo utero: & ut maneamus circa uterum, attenta constat animadversione, quod post lochiorum fluxum, item post omnes maiores sanguinis effusiones, non amplius rubicundus sanguis, sed tantum lymphæ quædam effluat, hanc sine dubio ob rationem, quia arteriolæ ultimæ, quæ ob angustiam globulos sanguinis non admittebant, a motu liquidi vitalis vehementi distensæ & apertæ, eliminato sanguine, qui eos antea dilataverat, nunc ad naturalem suum statum redeunt, nec sanguinis purpuram, sed fluidum tantum liquidum transmittunt. Plenaria enim non opus est ruptione vasorum, sed fissura tantum laterumque dehiscentia sufficit. His ita positis perspectu facile est, rectius in doctrina hæmorrhagiarum ad arteriosa quam venosa respici vasa. Tuto quoque opinor eandem de arteriis hæmorrhagiarum scaturiginibus adstructam sententiam, ad illam sanguinis excretionis speciem, quæ vomitus vocatur cruentus, applicari posse, quum similis similitum soleat esse ratio: attamen in sequenti thesi paulo curatius & pressius eam perquiremus.

### Thesis V.

Hinc sanguinis in vomitu cruento profluxus non ex vasis brevibus venosis fit, sed ex arteriis brevibus.

**A**Ntequam ad ipsam exponendam hanc thesin progrediar, brevem quamdam vasorum brevium præmittendi delineationem urget necessitas. Et ut prius de arteriis ex cœliaca oriundis dicam; illa ubi digiti transversæ latitudine ex aorta exiit, in duos dividitur ramos, sinistrum & dextrum. Hic sinister nostræ considerationis est; qui primo gastricam sinistram spargit, & ex hac epiploicam sinistram & gastro-epiploicam, pergendo deinde format pancreati-



cas, & in lienis viscus antequam immergitur, arterias breves tres vel quatuor ordinario dimittit. Notari autem hic in primis meretur, arterias breves cum gastricis anastomosi gaudere, ita ut flatus in has breves arterias immixtus promte per gastricas redeat. Venæ vero breves ad splenicam tendunt, quæ in venam portæ terminatur. Simulac enim truncus V. P. parum obliquo tractu sub duodeno & pancreate processerit, venas cysticas accipit, deinde in duos ramos dispescitur, cujus dexter ad mesenterium discedit, sinister ad lienem; in itinere aliquando admittens duodenam & hæmorrhoidalem internam, postea gastricam, coronariam ex gastricis oriundam, epiploicas, gastro-epiploicas, pancreaticas: mox ubi ad lienis parenchyma pervenit, tres vel quatuor furculos ex tunicis ventriculi sinistrae partis ortos assumit, vasa venosa breviter dicta, quorum sanguis cum lienari redeunte iunctus per splenicam venam ad commune oceanum gremium, nimirum venam portæ, fertur. His animadversis proximum est, ex quo genere horum vasorum sanguis vomitu cruento reiectus eructet, contemplari; nec auctores unam eandemque hic tuentur sententiam. Multi putant illum ex venis brevibus in cavum ventriculi expelli, idque eo magis, quia sanguis plerumque nigricantis coloris, qualis venosus lienaris vulgo habetur, evomitur, & quod hic vomitus sæpe hypochondriacos, quorum lien haut raro atro cruore refertus, cum magnis tensionibus in hypochondrio adfligat, ubi sanguinem crassum per venas breves ad ventriculum deduci & vomitu depleri arbitrantur. Sed minime hisce causis color iste debetur, dignumque videtur hac occasione paululum evagari, & ratione sanguinis, qui vomitu rejicitur ut plurimum crassus & nigrescentis aliqua inferere. Medici enim superiorum sæculorum, inter quos *Lomium Obs. Med. L. II p. 131.* adducam, a iecinore proficisci sanguinem splendidiorum ac magis purum, quem autem lien fundit, turbidiorum sub-



subnigrum & interdum acidum: alii recentiorum ex arteriis profluere sanguinem fluidiorem & rutilantem, ex venis grumofum & fulci coloris, existimant. Neutra vero horum sententia veritatis fulcro nititur. Nam vtut priorum sententiam, ex hepate aliquando delabi posse ad ventriculum sanguinem haut negaverim, illum tamen fluidiorem esse lienari minime concedimus, quum solida anatomicorum huius sæculi experimenta satis confirment, lienis sanguinem dilutiorem floridiorem ac magis attenuatum esse hepatico, id quod & lienis fabrica, & copia arteriosi liquidi, ad hoc viscus detrufi involvunt, ita ut lien pro machina sanguinem attenuante & propellente ad portam merito habeatur. Alteri sententiæ in tantum quidem assentio, quod arteriarum sanguis fluidior existat venoso in vasis suis contento: docet tamen observatio, sanguinem cito post extravasationem in ventriculo rejectum, dilutiorem & minus atro colore conspurcatum reperiri, si vero diutius in eo moram neſtat, coagulatum nigrumque prodire. Simulac enim motu cordis & arteriarum sanguis caret, per quietem acidumque ventriculi, in reliquiis a cibis potibusque deliteſcens, concreſcit, & magis ad solidi indolem accedit, quoniam acidum hoc cum sanguinis parte sulphurea & alcalina congregiens non modo colorem suum & consistentiam mutat, sed & pessimum induit odorem. Nunc redeundum est in viam, & indagandum, an vasa brevia venosa mittant sanguinem? Omne vero anatomicum scrutinium probat, per hæc vasa a ventriculo reduci liquidum, proindeque contra confuetum suum cursum regredi oportere: fieri enim natura nequit, vt venæ quidquam a liene ad ventriculum devehant breves: & si etiam per spasmodicas tensiones & pressionem sanguinis foret regressus, longe facilius in truncis suis, ventriculum inter & lienem existentibus, quam in suis ramis, per tunicas ventriculi, crepaturam multum impediētes, reptantibus, aperientur. Se-  
or-



orsum quoque ea est venarum ventriculi constitutio, ut omnes inter se coniunctæ & valvulis destitutæ, sanguis liberum habeat sursum deorsumque exspaciandi campum: nam injectus siphone liquor, vel flatus in vas breve immissus, vasa gastrica transit, cunctasque huius visceris venas prompte replet. Possemus etiam ad probationis augendam vim observationem *Loweri in tract. de Corde Cap. V.* allegare, qui in concursu venarum brevium cum splenica notabilem valvulam notavit, eius tamen, quia rarissime forsan reperitur, tantum meminisse sufficiat. Quid autem respondeamus observationi auctorum, qui vasa brevia aperta invenerunt, aut sanguine turgida? Hic primo monendum duco, me experientiæ plurimum deferre, sed fere semper generaliori titulo vasa nominari brevia, non accurate venas aut arterias indicando, imo paucos anatomicorum arteriarum brevium iniicere mentionem: hinc an non pari iure ad arterias applicari possint hæc dicta, &, si forsan aliquando inventa apertio aut turgescencia venarum brevium, utrum inde assertum a particulari ad vniuersale formandum sit, merito quæro? imprimis cum ratione venarum, quæ sanguine post mortem distentæ apparuerunt, causam arteriarum contractioni tribuendam esse iam supra demonstraverimus. Venis itaque ab hoc negotio exceptis cum *Highmoro, Conringio Lib. de sangu. generat. & motu C. 22. Rolfincio diss. anat. L. VI. c. 27.* aliisque gravissimis viris arterias breves hunc plorare sanguinem existimo, & quæ in priori thesi generaliter adstruxi, hic specialiter applicare decet. Subiungam vero adhuc observationem practicam, qua in vomitu cruento correptis non raro lienem vel obstructum vel infarctum, imo ut *Illustr. D. Præses* observavit, cartilagineum reperimus, & sequens ex ea eliciam ratiocinium, quod lienis vasculis obstructis, appulsus per arterias ad illa sanguis necessario regurgitet, & maiori impetu in vasa, quæ iuxta sunt, breves nempe arterias feratur



tur ad ventriculum, & nisi data per venas aperta via reducatur, facile ultima arteriolarum, utpote tenerrima tunica conflatarum venisque continuarum, extendantur & aperiantur. Nec opus demum est, ut in ventriculo a perruptione arteriarum remaneant stigmata seu cicatriculæ, uti nec in utero tales, quando plethora per menses evacuata est, oculum subeunt: distentis enim antea arteriis, & nunc emisso sanguine ad pristinum statum redeuntibus, ea disparent.

### Thesis VI.

Nec alias vias excludo, per quas sanguis ad ventriculum deferri possit.

**L**ongius enim petatum esse videtur, quando de vasis brevibus unice philosophamur, siquidem & ratio & experientia dictitat, ex aliis etiam partibus vasisque sanguinem fundi. Fieri autem hanc fusionem vel in reliquis ipsius ventriculi locis, vel in vicinia ipsius, unde adhuc aditus ad stomachum patet convenit: proindeque duodenum superioremque tenuium intestinorum tractum volo, ex quibus haut difficile, testante id vomitu, materia collecta in ventriculi gremium amandatur: nec negaverim ex reliquo etiam intestinorum tractu, eorum peristaltico motu inverso, contenta deduci in ventriculum, quæ alias per inferiorem portam solent expurgari, uti ex passione patet iliaca. *Sylvius & Ettmüllerus* ex pancreate ad duodenum & ventriculum sanguinem plerumque deponi asseverabant. *Scul-tetus obs. XXX. Arman. chir. & Dionis Demonstr. VII. oper. chir.* illum ex vasis lingualibus in infantibus discisis; fluentem & deglutitum, tandemque in ventriculo coacervatum cum subsequuta morte annotarunt. Sed missis his viis aliæ adhuc reperiuntur; & primo adsunt rami vasorum gastricorum, ubique per hoc nobile viscus disseminatorum, ex quibus non solum *Blancardus, Bohnius* aliique au-  

ctores



ctiores sanguinem fundi observarunt; sed quoque idem sana ratio suadet: quia sanguis venosus in V. P. propter obstructionem quandam hepatis facile potest accumulari, unde obstaculo præsentē, in flumine suo tardatur ac restagnat, sanguinique subsequenti venoso gastricarum venarum resistit, a qua pressione & resistantia vasa antea dictarum arteriarum lateralia & secretoria dilatari possunt & aperiri; quid? quod pervasa erosa tunica vasculosa ventriculi a venenis, vel disrupta ex vulneratione, (quæ ut accurate brevia lædant vasa haut credibile est) eundem ex hisce gastricis arteriis effluxum produci putaverim. Nec videtur repugnare possibilitati talem evacuationem per arterias mesaraicas in intestinis tenuibus, præsertim in duodeno & ileo fieri, unde per pylorum mediante vomitu ventriculum ingredi, ac reici potest, inprimis cum membranae horum intestinorum sint admodum teneræ: neque iniuste *Riverius Cent. 1. obs. 45.* existimat, si vomitus cruenti paroxysmus ab excretionē sanguinis per alvum inchoetur, vasa mesaraica apertionem hanc sustinere: cui & id adiacendum esse æquum reor, in enormi vomitu sanguinis vix sufficere posse cruorem, quem vasa ventriculi largiuntur, nisi intestinorum vasa simul partem quandam suppeditent. Ita quoque iuxta *Cel. Bergerum in diss. de hæmorrhoidibus*, vix quidquam obesse video, quo minus pars sanguinis aliquando ex hepate per ductum cholodochum in duodenum & exinde ad stomachum urgeri possit, & quidem iis circumstantiis, quando nempe vel crassus corruptus sanguis in ramificationibus hepatis collectus, vasis eandem labem affricat, eaque perforat, vel nimis ferofus ac minus cohærens poros vasorum felleorum laxando in ramos ductus biliarii cum bile confluit, & per laudatam viam ad duodenum amandatur.



Thesis VII.

Ad periodicum vomitum cruentum explicandum  
causæ mechanicæ sufficiunt.

**P**ER causas mechanicas illas intelligo, quæ fundamentum suum in contextu illo solidorum & fluidorum, ex quibus corpus nostrum coaluit, & in motu suo conservatur, mutuuntur: quamdiu enim hic ordo structuræ microcosmicæ viget, nullus nostram machinam affligit morbus, simulac vero hic ordo destruitur, morborum aperitur scena. Vix autem ab ulla alia causa magis ille turbatur, quam a motibus spasmodicis, meritoque in illis fundamentum morborum periodicorum quærimus, uti egregie *Illustr. D. Præses Med. rat. P. II. p. 141.* admonuit; quippe nulla datur morbosa affectio, per intervalla certa repetens, quæ sine spasmis peragatur. Hi vero vario modo suum huc conferunt symbolum. Peculiare enim id illis est, ut partes, quas semel occuparunt, reddant imbecilles: quo vero pars est imbecillior, eo facilius iterum vehementiæ illorum succumbit, eoque promptius perversum motum repetit: nam dissipata, constrictione agitatione & contorsione fibrarum per spasmos, delibatissima humorum lympa, quæ partibus robur conciliat, aliter fieri nequit, quam ut tono suo afflicte partes deiciantur, quo deinde deiecto, inæqualis non solum humoribus inducitur circuitus, sed quoque in illis partibus fiunt a fluidis congestiones stagnationes novorumque spasmodorum fundamenta. Immo spasmi partibus solidis talem acquirere valent habitum, ut postea levissima accedente causa, eos naturæ inimicos motus de novo exerceant, præsertim quum spasmi humores maxime ad infirma ablegare soleant loca. Cur autem hispasmotici motus accuratas temporum periodos servant, id causæ in certa illa quantitate humorum sub determinato illo temporis spacio collecta, positum est. Quemadmodum  
C 2 enim



enim certus motus proportionatam causam moventem certumque tempus requirit, quo durante certa quantitas humorum ad motum inducendum potens colligi debet: sic non video quid obftet, vomitum cruentum periodicum, proportionata sanguinis quantitate intra periodum istam collecta, & ad novos spasmodicos motus inducendos valida, denuo suboriri. Sufficit vero quantitas perexigua; quia partibus solidis per spasmodicorum atrociam talis labe, atoniam puto, inducta est, ut sanguine qualitercunque reparato, ille ad hæc loca debito robore destituta maiori in copia ruat, ibique congestus vasa ultra diametrum suam consuetam distendat, & pristina orificia, per quæ una vel altera vice exitum invenit, reserat. Iam autem fere semper in affectu hoc periodico suppressæ excretiones solennes, inprimis quæ per uterum & ani vasa fiunt, indeque maior, quam corpus commode fert, producta sanguinis quantitas, causam largiuntur, ita ut feminis fluxu suo salutari destitutis, insuper plethoricis lautaque diæta utentibus, statò illo tempore, quo menstruæ purgationes erumpunt, accidat, harumque vices suppleat. Imò animadvertimus, menstruo vel hæmorrhoidum fluxu restituto, sponte sua hunc vomitum evanescere, ut testantur *M. N. C. D. I. ann. I. obs. 95.* manifesto indicio superfluam sanguinis copiam, nunc per congrua loca eliminatam, spasmodicis vomituque cruento ansam præbuisse.

### Thesis VIII.

Quod propter connexionem vasorum uteri cum vena portæ oriatur a mensibus suppressis vomitio cruenta, haut admitti potest.

**A**D hanc formandam thesin occasionem mihi suppeditavit *Clar. Christ. Weisbach in cura omnium morborum cap. de Vom. cruento*, qui ob constitutionem venæ portæ eiusque



que communicationem cum venis uteri, originem ac causam vomitus sanguinis a mensibus suppressis detegere contendit; ita ut quando sanguini per vterum exitus denegatus, ille in venam portæ copiosius confluat, stagnet, & per hep- par non promte percoletur, unde spasmi in abdomine o- borirentur, qui tandem sanguinem venæ portæ in vasa bre- via ventriculi urgendo ac reprimendo, vomitum cruen- tum producerent. Cui deductioni respondeo: ex supe- rius dictis, quibus asserui sanguinem arteriosum in hæmor- rhagiis mitti, iam patescere, venosum exsulare deberé, proindeque hanc de V. P. cum uteri venis connexionem sen- tentiam suo destitui solido fundamento: attamen quum & aliæ rationes suppetant, hanc allatam connexionem va- forum evertentes, eas ex anatomica partium disquisitione desumtas asserre decet. Sanguis enim ex utero refluus per spermaticas & hypogastricas venas in cavam effunditur, non vero in venam portæ: recensentur quoque hæmor- rhoidales venæ, quarum externa similiter in cavam termi- natur mediante hypogastrica: interna vero, quæ sangui- nem ex crassis intestinis vesica & vagina uteri revehit, ad venam portæ properat: communicant etiam iuxta *Cel. Salzmannum in diss. de vena portæ*, hæ venæ hæmorrhoida- les inter se, sed ex ipso utero proveniens ramulus, qui cum hæmorrhoidali interna & per hanc cum vena portæ communicatione gaudeat merito postulatur, eumque non- dum vlla anatomicorum detexit solertia. Concedamus insuper adesse ob arctum intestini recti cum vesica & ute- ro nexum tales furculos, quia venarum lusus in corpore humano magnus est, quam, quæso, & quantam eiusmodi exiguæ venulæ sanguinis copiam revehere valebunt, quæ tantas turbas in machina corporis excitare possit? Ut iam de refluxu sanguinis lienaris per hæmorrhoidalem, inde- que producto lienis infarctu, taceam, quem fictitium esse, legibusque hydraulicis reclamare *Clar. Nicolai in*



*Diatriba de vasorum directione* candidè detexit. Quare aliam certe latere causam vomitus cruenti a mensibus suppressis sustentati, concludimus, quæ utique quærenda venit non in vasorum communicatione, sed nervorum consensu, iisque rebus, quæ nervosas partes morbose afficiunt, inter quas præcipue recensenda sunt, plenitudo vasorum totius corporis a copia sanguinis ex cohibita mensium excretionè ingènita, indeque orti spasmi, quibus omnia corporis nostri vasa exposita sunt, & unde etiam alias sanguinis excretionès ex eadem causa strui sæpius experimur. Hunc commemoratum consensum nervorum, indeque ductam rationem anatome docet. Ita uterus & adiacentes partes communes suos nervos partim ex nervo sacro, partim ex intercostali, ejusque inprimis inferiori plexu mesenterico accipiunt. Cumque nervus intercostalis permultis in locis cum pari octavo, vago dicto, in collo thorace & abdomine plexus formet; hæ vero ad uterum abeuntes nervorum propagines arctissime cum intercostali cohæreant, imò ab eo ipsum ortum trahant, luculenter patet, ob spasticas strictiones his nervis inductas varias commotiones in systemate vasorum produci posse, monstrante passione hysterica, maloque hypochondriaco.

### Thesis IX.

Necesse est vt medicus accurate perlustret materiam in vomitu cruento reiectam.

**U**Ti formatum prudenter iudicium de futuro morbi decursu & eventu, medici famam maxime auget & promover: ita per temerariam minusque considerate prolata prognosin non solum se, sed & totam artem salutarem dat turpiter. Proinde medicus inter alia saluberrima monita & hoc caute custodiat, ne uno vel altero signo obiter



ter tantum considerato se decipi patriatur, morbumque toto coelo ab alio distinctum falso pro eodem venditet. Accidit idem quandoque in vomitu cruento, iuvatque sequentia hic inferere ad probandam thesin exempla, ubi medici in iudicio ex materia vomitu exclusa ferendo valde hallucinati sunt. Ita *Illust. D. Præses in Med. Consult. T. II. p. 81.* consignavit casum ægri inflatione ventriculi & duodeni hypochondriaco spasmodica excruciat, qui interdum per eructationem materiam nigricantis & brunni coloris eiecit, quam medicorum alii pro nigra & corrupta bile, alii pro vomitu cruento, nonnulli pro vomitu critico hæmorrhoidali venditarunt. Sed instituto ab Illustri viro huius eliminati magmatis accuratori scrutinio, nil sanguinis ingremio suo fovere, sed potum Succuladæ originem huic materiæ dedisse clare demonstravit. *Fel. Platerus Lib. III. obs. p. 783.* vomitionem sanguinis annotavit, ubi suspicio fuit lienis vel hepatis portionem simul redditam fuisse, quæ tamen pulpa ficum, perlustratione & examine docente, fuit. Convenit igitur hanc vomitu depletam farcinam examinare, & an certo sanguis subsit, expiscari, si aquæ iniiciatur, illaque colorem inde mutuetur rubicundum, seu, quod adhuc certius est, materia illa prius evaporata, carbonibus vivis admoveatur, ubi sub combustionem sanguis foetido suo salis volatilis odore se prodet: quibus facile alia scrutandi experimenta adiici possunt, addendo & miscendo cum variis aliis rebus.

### Thesis X.

Feminis familiarior est quam viris: hisque magis exitialis quam illis: infantes rarissime infestat, sed frequenter adultos.

**C**UM fere impossibile sit, ob ingentem individuorum & circumstantiarum variationem certis regulis omnem vomiti-



mitus cruenti prognosin comprehendere, hanc ex ea generalem & quotidiana experientia comprobata thesin proponere, & maxime in rationes eius inquirere satis videtur. Quæstio itaque erit, cur feminis observetur hæc affectio familiarior quam viris? Sed scire proderit, eam structuræ & habitus corporis partium, quibus sequior sexus gaudet, esse rationem, ut spongiosi, laxi, exilioribus vasis instructi, subtilis ac imbecillioris ut plurimum sint corporis, ideoque variis ægritudinibus exponantur. Tardior enim inde sanguinis peridromus peragitur, languescit, maior eius copia, quam ferre valent, in iis generatur, ex qua humorum abundantia, nisi per uterum evacuetur, hæmorrhagiis aperitur porta. Porro rationem huius quæstionis suppeditat naturalis illa menstrua evacuatio feminis solummodo competens, in cuius congrua excretionem valetudo feminarum prospera maxime versatur, unde ea non rite succedente vel plane cohibita, insigne in hunc elegantiores sexum redundat damnum: non solum enim humores plus iusto colliguntur, sed quoque ubertim aggravati, motus sollicitant, congestionemque ad alia loca inducunt, spasmisque lenocinantur. Deinde quoque ratio asserti nostri desumenda venit, ex maiori illa generis nervosi ob teneritudinem, flexibilitatem maiorem & ad citatiorem motum aptitudinem, in sexu sequiori ad spasmos motusque inordinatos præ viris propensione, unde ad animi commotiones spasticasque stricture subeundas valde observantur proclives, quarum sane maxima vis est in pervertendo motu solidorum ac fluidorum: imo ob imbecille hoc nervosarum partium genus corporisque compagem vires motusque quodammodo deficiunt, excretionem labascunt, succique accumulatur. Consistit vero sanitas mortalium maxime in æquabili & liberiori sanguinis periodo & vacationibus debite succedentibus; hæc autem a prædictis aliisque causis in feminis facile perverti possunt, qua-



quare non mirandum illis nostrum quoque affectum familiariorē esse viris. Nunc ad alterum descendo thesēs nostræ membrum examinandum, cur nempe viris magis exitialis sit vomitus cruentus quam feminis? Et similiter ex structura corporis maximeque solidarum partium rationem desumo. Viri enim ut plurimum firmo, robusto, fibris solidis ac compactis, magis renitentibus prædito corpore fruuntur, unde hoc morbo afflictos necesse est ut causa longe gravior urgeat, & spasmi quoque hæmorrhagiarum soboles vehementiori cum impetu aggrediantur, quia fibrarum maior adest durities & soliditas: quo fortior autem causa, nimirum intensior spasmus vexat, eo maius periculum & vehementiam alit, eo profundior insequitur labes, imbecillitas, compressio sanguinis ad locum affectum, viriumque resolutio: & hic spasmus semel fibris motricibus communicatus, non tam cito eas deserit, sed diutalem infestum motum continuando, plerumque cum ipso vitæ exitu terminatur, lethali sphacelatione & ~~vexatōe~~ in ventriculo relicta, vel si aliquando remittat, vix sensibili tamen admissa causa, eodem, atque ob fibrarum tonum resolutum, etiam vehementiori insultu recrudesceat mortemque accelerat. Quibus adhuc addendum est, quod sexus nobilior non tantam sanguinis copiam quam elegantior gignat, proindeque magnam eius iacturam non sine damno experiatur: sique abundantiam quamdam humorum foveat, nec per hæmorrhoides, quibus quantitas sanguinis salutariter evacuari solet, exitum inveniat, certe maior inde labes ob habitum strictiorem in eos redundat, quam in feminas spongiosa carne onustas. Ultima denique thesēs nostræ verba expostulant rationem quare infantes rarissime, adultos vero frequenter vomitus cruentus adfligat? Quam meo quidem iudicio ab ætate rectissime peti existimo, hujus siquidem magna efficacia est in morbis invitandis: quare certis ætatum periodis certos morbos accidere, & proprios infantili ætati morbos maxime caput affligere animadvertimus, cuius fundamentum



in dispositione solidarum partium ad motum & ad humores in motum redactos & adductos recipiendo non iniuste querimus. Infantum enim fibræ flaccidæ ac debito robore adhuc destitutæ sunt, unde languidus cordis solidorumque motus, qui ad vomitum cruentum inducendum minus est idoneus, quamquam sanguinis aliorumque humorum in iis conspicua habeatur abundantia, quæ tamen eo ætatis lustro ad dilatandam & augendam partium solidarum substantiam commode impertitur: hinc deficiente plenitudine humorum, cessat primaria vomitus cruenti causa, in adultis vero elater fibrarum est maior, cordis motus & arteriarum longe validior, ob augmentum corporis tunc ætatis maxima ex parte absolutum largior sanguinis productio, & in feminis quoque mensium negotium accedit, proindeque huius ætatis subiecta hæmorrhagiis vomituique cruento magis exposta sunt atque succumbunt.

Thesis XI.

Venæ sectio in vomitu cruento raro omittenda est.

**O**pportunus hic locus est, quamdam nostri morbi inferendi curationem, quæ pro diversis causarum fundamentis temporisque ratione diversimode quoque debet institui. Hinc durante paroxysmo, ea quæ sanguinis redundantiam minuunt, orgasmum eius sedant, affluxum a parte succumbente divertunt, spasmodumque vim mitigant, requiruntur, ut venæ sectio, pediluvia temperata, in primis clysmata emollientia, & ex remediorum fonte nitrosa, præcipitantia & antispasmodica ex duris animantium partibus parata, ut sunt: Ungula alcis, dens equi marini, C. C. s. igne parat. & eius generis plura. Necesse quoque est, urgente vomitu, periculumque virium vitæque minante ad roborantia tonica, lenissima adstringentia & anodyna descendere, ut sunt: corallia rubra, terra sigillata, bolus armena, C. C. ust. præp. cortex & extractum cascarillæ, species de hyacintho, massa pilularum de cynoglossa, de styrace, temperatæ tincturæ martis, &



& alia eiusdem virtutis: quibus externa commode adduntur, ut emplastra stomachica, cataplasmata ex aromatibus herbisque fragrantibus in vino decoctis confecta. Sedata quadantenus hisce remediis sanguinis eructatione, animus curantis ad sanguinem in grumos concretum, & in primis vis quiescentem dissoluendum, & per inferiora educendum dirigatur, cuius præsentiam faciei color luridus, debilitas pulsus, stomachi inflatio produnt, & huic scopo egregie respondebunt clysmata & ex rhabarbaro deprompta. Post paroxysmum vero morbi causas sedulo medicus investiget, circulum sanguinis in ordinem redigat, evacuationes solennes cohibitas restituat, & quantum fieri potest radices morbi ulterioremque mali proventum præscindat. Omnium vero harum causarum medendi viam præmonstrare non mearum est virium, sed exercitioribus relinquo practicis, quorum scripta evolvi queunt: attamen ne statim filum orationis de curatione abrumpam, in hac & sequenti thesi quædam ad curam pertinentia, specialius scrutabimur, quorum agmenducat venæsectio, quæ merito inter generosa maximam & nocendi & juvandi efficaciam possidentia refertur remedia, proindeque omni qua potest fieri circumspeditione a medico suadenda. Neutiquam autem mihi mens est ut contendam, venæsectionem unicuique subiecto omnique morbi statu administrari oportere, sed cum plerasque in tollendo vomitu cruento respiciat, imo ferre absolvat indicationes, eam & proficuum & raro intermittendam esse pronuntiamus. Primo enim abundantiam sanguinis, multorum morborum & in primis vomitus cruenti fœcundam matrem, minuit. 2) Ex hac copia sanguinis provenientem vasorum superonerationem, innatæque eorum contractionis destructionem, prohibet, sicque debilitato tono vasorum succurrit; detracto enim onere, quod vasa antea ultra suam diametrum distenderat, vires suas pristinas colligunt, mouendaque fluida commode propellere valent. 3) Exercitio contractionis extensorum antea vasorum

D 2

restit-



restituto, æqualem ac debitum sanguinis progressum restituit, pulsu nempe reddito fortiori ac celeriori: hinc quoque stases a nimia copia generatas præoccupat, & præsentis, sanguinis affluxu vigente, resolvit ac discutit. 4) Cessantes in locis consuetis naturales hæmorrhagias, ex quibus, teste experientia sæpissime vomitus cruentus resultat, ad debita & congrua sua loca invitat: ita ut si a mensibus suppressis ille inducatur, fere semper maximo cum fructu, sanguinis missio in pede suscipiatur: quorsum etiam omissæ artificiales sanguinis euacuationes pertinent. 5) Sanguinem ad ventriculum ruentem & decumbentem derivat ac revellit, periculumque imminens avertit: nam instituta sanguinis missione derivatoria ac revulsoria, ut vocantur in scholis, quæque in remotis fieri debent partibus, sanguis ad venam arte apertam magis fertur, quantum nempe circulationis lex ac vasorum communio situsque permittunt, & quatenus sanguinem hac ratione a parte morbosa avocat, efficit, ut per arteriarum canales ingressuro fluido viæ pateant, & per venarum ductus impeditæ refluat, sublata quæ inepta erat copia. 6) Immoderatum nimium ac ulteriorem sanguinis ad ventriculum affluxum compescit intercipit & prohibet. Et denique, ne nimis longus sim, 7) crasin ipsius quoque sanguinis emendat, dummodo spissos & lentescientes ex tardiori circulatione humores, a quibus se & excretionum liber successus impediatur, & ad effusiones eorum remote pabulum subministrabatur, fluidiores reddit, restituendo sanguini per augmentum tonum vasorum promptioremque in orbem agitationem, particularum discontinuationem. Tanti itaque fructus ex detracto nimio sanguine observantur, patetque ex hac recensione, non solum quo casu in hoc nostro affectu sanguinis missio locum inveniat, sed quoque eam præservandi & quodammodo tollendi gratia, non facile negligendam esse, quum nullum hæctenus suppetat in arte salutari remedii genus, quod tam multis explendis indicationibus simul & semel inserviat. Restant vero adhuc circa eius administrationem



nem quædam monenda, & primo convenit eam intactam relinquare, ubi vires non suppetunt, & hoc generoso remedio ferendo impares sunt, aut alia obstacula, quorsum animi deliquia referimus, eam prohibent, ne mortem exhausto vitæ thesauro, acceleremus. Secundo quantitatem emittendi sanguinis, venæsectionisque pro causa urgente repetitionem, ex magnitudine plethoræ, causarum ratione, morbi impetu viriumque robore esse mensurandam. Tertio venæsectionis usum necessario continuandum esse, præsertim præservandi scopo circa æquinoctia, ne malum repullulet, idque eo magis tenendum censeo in plethoricis otiosis plenamque diætam sectantibus.

Thesis XII.

In vomitu cruento laborantibus cavendum ab adstringentibus, copiosis liquidis, exagitantibus medicamentis, & victu incongruo.

**R**Efero ad adstringentium classem styptica, vitriolata, martialia, saturnina & aliquo etiam modo actu frigida, quibus magna inest efficacia sistendarum hæmorrhagarum, ut ut modus operandi eorum plane sit singularis ac admirandus, ita ut promptissime in dissitas partes corporis effectum edere, & ratione hæmorrhagarum, molientes adjuvare, & fluentes cohibere observentur. Videtur veritamen simillimum, ea in vomitu cruento coercendo agere partim fluida coagulando & inspissando, fibras & vascula crispando porosque contrahendo, & constrictis illis ulteriorem sanguinis eruptionem intercipiendo. Notari autem oportet, nil sanitati magis inimicum esse, quam paulo maiores sanguinis per vomitum cruentum profusiones statim validis adstringentibus aggredi, nec opus est ulla probatione, quum multa loquantur exempla. Succedunt enim proxime anxietates, cardialgiæ syncopticæ, atroces circa hypochondria spasmi, indeque enatæ stases vel feri vel sanguinis inflammatoriæ in ventriculo partibusque adia-



centibus, obstructions, cachexia, hydrops, viscerum corruptiones, morbi chronici, periculosa aliis in partibus eruptiones, & innumera alia pathemata. Cum vero rarius subitaneum vitæ periculum eiusmodi spontaneas hæmorrhagias subsequatur, longa autem frequentius adstringentium abusu funesta & longa invaletudo remaneat, minus causæ est, extemplo ad ancipitem hunc sistendi modum festinare. Siquidem eiusmodi vomitus cruentus vel a sanguinis nimia copia provenit, vel ab internarum partium spasmo variis ex causis inducitur, utique ingens damnum emerget, si fluxus hic subito compescatur: si enim ex sanguinis copia producat, salutaris est; si in motibus perversis spasticis fundamenta habet, illi adstringentibus non mitigantur, sed potius cum ipsis augentur eruptionibus: nunquam autem, quod maximum est, causa morbi eradicatur. Proinde in usu horum remediorum medicus inprimis sit providus, temporaque morbi bene distinguat, & ad quem gradum in oblatione illorum progredi liceat. Interdum enim summa necessitas adstringentium opem exigit, sanguine nimirum impetuose per vomitum cum manifesta virium iactura, & subsecuturo in evitabili vitæ exitu effuso. Sed cautela esto, ut a lenissimis incipiamus, & prius spasmis leniendis ac coercendis, abundantia sanguinis deplenda, & impetum humorum ad congrua loca divertendo, omnem admoveamus manum. Porro quoque vomitu cruento detentus copiosum liquidum vitet, diximus. Neutiquam vero hic omnem potum excludimus, sed tantum copiosum, qui ad sanguinis iacturam refarciendam primo intuitu proficius esse videtur. Potus enim roborans, tepidus, convenienti dosi haustus, nunquam prohibendus: in nimia copia vero ingurgitatus, inprimis decocta, relaxando fibras ventriculi, earum tonum elaterem ac robur imminuunt, digestionis vim destruant, facileque ad novam sanguinis prurptionem, vasis robore destitutis, iterum disponunt: sanguis etiam per decoctorum abusum fit nimis fluxilis, liquidus, unde nova ex-

ti-



timeſcenda hæmorrhagia. Deinde omnia, quæ ſanguinem exagitant, nervoſasque partes ad motus præternaturales ſubeundos ſtimulant, in hoc affectu cane peius ac angue fugienda veniunt, ut ſunt emmenagoga purgantia emetica, imò ipſi motus fortiores ac incongrui corporis. Sic nil frequentius eſt, quam ut menſium vitio indeque enata chloroſi laborantibus, menſes pellentia ab improvidis porrigantur; quæ tamen imprudenti medicatione sæpe incompeſcibiles vomitus ſanguinis producti leguntur. Et de emeticis purgantibusque omnes præctici candide monent, quod, qui ſemel vomitum talem paſſus, ex toto iis abſtineat, ne horum uſu remediorum ventriculo & in-  
teſtinis ad vehementes ſpaſmos irritatis, ſanguis priorem perruptionis locum cum certa ægri pernicie, quærat ac inveniat. Calida quoque remedia & motus corporis fortiores, maſſam ſanguinis in motum conſciendo celeriores, & ad debiles partes coacervando, anxietates, recidivas excretionum, virium lapſus, animi deliquia, & alia triſtia accerſunt ſymptomata præſertim in ſubiectis labe viſcerum afflictiſ. Noviffime, ſicuti victus prava ratio, in omnibus & præcipue in hoc morbo maxime nocet, tormina & ſpaſmos procreando, ventriculum onere gravando motumque eius augendo, vomitumque hunc invitando: ita diæta exacta, quæ proportionem inter vires victumque obſervat, maximum affert ad curationem huius morbi pondus, nec facile perfectæ ſine eius circumſpectæ obſervatione ſperanda erit valetudo.

F I N I S.



# FRIDERICVS HOFFMANNVS

ACADEMIÆ h. t. PRORECTOR

*CANDIDATO MEDICINÆ DIGNISSIMO*

DOMINO ERNESTO EMMANUEL GVTTORF

S. D. P.

**I**Nstitutio & diligentia duo sunt requisita, ad Medicinam rite, & addiscendam, & exercendam, inprimis necessaria. Vtrumque felici connubio junctum in Te, *Candidate præstantissime*. Nihil enim unquam intermisisti eorum, quæ ad percipiendam scientiam medicam solidam facere potuerunt. Ab unius ore pendere angustum nimis fuit diligentia Tuæ plus ultra nitenti. Plures hinc adiisti Academias, Altorfinam primum, dein nostram, demum Vitebergensem. Vbique autem solers & attentus audivisti viros, quos eruditio & ipsius artis usus reddidit celeberrimos. Neque tantum audivisti sed intimiorem admissionem erecta indole & discendi desiderio Tibi comparasti, quo fructus inde in Te redundaret eo uberior. Inprimis felix Tibi obtigit studii medici auspiciū, in contubernio cognati Tui, viri tam in re medica, quam ad omnem eruditionem spectante, doctissimi, *Domini SCHVLZII*, cum quo per triennium in literis tantum non habitasti. Is enim prium Tibi inspiravit discendi ardorem, quem ipse sustentasti postea jugiter eidemque fere cum quadam intemperantia obsecundasti, ut necessum fuerit subinde monere, ne in sanitatem esses injurius. Quo, quantum profeceris, ego pluribus exponere supersedeo, sed testes sint theses præmissæ inaugurales, quas Tu, raro exemplo, conscripsisti solus, & quidem tam egregie, ut non necessum fuerit, vel verbulum mutare. Noster igitur ordo, explorata hac studiorum Tuorum maturitate, lubentissime Tibi contulit diligentia præmiū, Doctoris dignitatem. Neque dubitandum, quin idem felix successus, quem in addiscenda Medicina institutione fida & diligentia expertus es, Te etiam in eadem facienda sit mansurus, si trita hucusque viæ insistes & cum solertia ac prudentia, artis tractabis opera. Quod ut certo ac ubertim eveniat, conceptis votis exopto. Vale. Deprop. Halæ Magdeb. idib, Martii. clolcccxxix.







